

ԱՄԵՆԱՅՆ ՍՐԲՈՑ ՀԱՅ ԱՌԱՔԵԼԱԿԱՆ ԵԿԵՂԵՑԻ

ARMENIAN ALL SAINTS APOSTOLIC CHURCH



ԿԻՐԱԿՆՕՐԵԱՅ
ԳԻՇԵՐԱՅԻՆ ԵՒ ԱՌԱՕՏԵԱՆ
ՀԱՄԱՌՕՏ ԺԱՄԵՐԳՈՒԹԻՒՆՆԵՐ

Glenview, IL

2022

-Հրաժարիմք ի սատանայէ եւ յամենայն խաբէութենէ նորա՝ ի պատրանաց նորա, ի խորհրդոց նորա, ի գնացից նորա, ի չար կամաց նորա, ի չար հրեշտակաց նորա, ի չար պաշտօնէից նորա, ի չար կամարարաց նորա եւ յամենայն չար զօրութենէ նորա հրաժարելով հրաժարի՛մք:

-Եւ ապա դառնամք ի լոյս Աստուածգիտութեան:



Քհնյ. Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս ես, սուրբ եղիցի անուն քո: Եկեացէ արքայութիւն քո, եղիցին կամք քո որպէս յերկինս եւ յերկրի: Ձեաց մեր հանապազորդ տուր մեզ այսօր, եւ թող մեզ զպարտիս մեր, որպէս եւ մեք թողումք մերոց պարտապանաց: Եւ մի՛ տանիր զմեզ ի փորձութիւն, այլ փրկեա՛ զմեզ ի չարէ: Ձի քո է արքայութիւն եւ զօրութիւն եւ փառք յաւիտեանս. ամէն.

Քհնյ. Տէ՛ր, եթէ զշրթունս իմ բանաս, բերան իմ երգեսցէ զօրհնութիւնս քո:

Սրկ. Օրհնեալ է Աստուած

Քհնյ. Տէ՛ր, եթէ զշրթունս իմ բանաս, բերան իմ երգեսցէ զօրհնութիւնս քո:

Սրկ. Գովեալ է Աստուած

Քհնյ. Օրհնեալ համագոյ եւ միասնական անբաժանելի Սուրբ Երրորդութիւնն՝ Հայր եւ Որդի եւ Հոգի Սուրբ այժմ եւ միշտ եւ յաւիտեանս յաւիտենից. ամէն:



Դպ. Տէ՛ր, զի՛ բազում եղեն նեղիչք իմ, եւ բազումք յարեան ի վերայ իմ, Բազումք ասէին զանձնէ իմմէ, թէ՛ չիք փրկութիւն սորա առ Աստուած իւր:

Դպ. Ողորմութեամբ քով սատակեա՛ զթշնամիս իմ եւ կորո՛ զամենայն նեղիչս անձին իմոյ, զի ես ծառայ քո եմ:

-Փառք Հօր եւ Որդւոյ եւ Հոգւոյն Սրբոյ այժմ եւ միշտ եւ յաւիտեանս յաւիտենից. ամէն:

-Յիշեսցուք ի գիշերի զանուն քո, Տէ՛ր,

-Բղիխեսցեն սիրտք մեր զբան բարի, եւ լեզուք մեր պատմեսցեն զգործս երկնաւոր թագաւորիդ:

-Ի մէջ գիշերի յարուցեալ խոստովանեսցուք զքեզ, Տէ՛ր:

-Ձաղօթս մեր տացուք քեզ, Տէ՛ր, ի գաւիթս քո՝ ի մէջ Նոր Երուսաղեմի:

-Ի գիշերի համբարձցուք զձեռս մեր սրբութեամբ առ քեզ, Տէ՛ր:

-Ի ձայն գոհութեան, ամենա՛յն հոգիք, օրհնեցէ՛ք զՏէր:

-Ձարթի՛ք, փա՛ռք իմ, զարթի՛ք. եւ ես զարթեայց առաւօտուց. ալէլուիա:

-Ձարթի՛ք ընդ զուարթունս, մանկո՛ւնք Վերինն Սիոնի. ալէ.

-Ձարթի՛ք, որդի՛ք լուսոյ, ի յօրհնութիւն Հօրն լուսոյ. ալէ.

-Ձարթի՛ք, փրկեա՛լք արեամբ, եւ տուք զփառս Փրկողին. ալէ.

-Ձարթի՛ք, վառեա՛լք լուսով ըստ իմաստուն սուրբ կուսանացն. ալէ:

-Ձարթի՛ք, երկիրպագցուք եւ արտասուօք զայս ասացուք. ալէ.

-Ձարթի՛ք, ընդէ՛ր ննջես. Տէ՛ր, մի՛ մերժեր զմեզ իսպառ:

-Արի՛, Տէ՛ր, օգնեա՛ մեզ. տացուք անուանդ քում զփառս:

- Այժմ եւ յաւէտ Հօր եւ Որդւոյ եւ Սուրբ Հոգւոյն. ամէն:
- Զարթուցեալքս ի զբաղմանէ գիշերային հանգստենէ:
- Շնորհեսցէ մեզ մարդասէր Տէր մխիթարութիւն եւ ի սփոփանս Եկեղեցւոյ:
- Ահիւ եւ դողութեամբ կացցուք ի յաղօթս:
- Եկեալ խոստովանեսցուք զյանցանս
- Եւ գտցուք ի Քրիստոսէ զբաւութիւն եւ զմեծ զողորմութիւն:
- Ամէն. ալելուիա, ալելուիա, ալէ:
- Ամէն. ալելուիա, ալելուիա, ալէ:



- Տէ՛ր, ողորմեա՛, Տէ՛ր, ողորմեա՛, Տէ՛ր, ողորմեա՛:
- Առաւօ՛տ լուսոյ, արեգա՛կն արդար, առ իս լոյս ծագեա: Բղխո՛ւմն ի Հօրէ, բղխեա՛ ի հոգւոյս բան քեզ ի հաճոյս:
- Գա՛նձդ ողորմութեան, գանձիդ ծածկելոյ գտո՛ղ զիս արա: Դուռն ողորմութեան դաւանողիս բաց, դասեցո՛ վերնոցն:
- Երբեա՛կ միութիւն, եղելո՛ց խնամող, եւ ինձ ողորմեա՛: Զարթի՛ր, Տէ՛ր, յօգնել, զարթո՛ զթմրեալս՝ զուարթնոց նրմանիլ:
- Խորհրդո՛ց գիտող, խաւարիս շնորհեա՛ խորհուրդ լուսաւոր: Ծնո՛ւնդ Հօր ծոցոյ, ծածկելոյս ստուերաւ ծագեա՛ զլոյս փառաց:
- Կենարա՛ր Փրկիչ, կեցո՛ զմեռեալս, կանգնեա՛ զգլորեալս: Հաստեա՛ հաւատով, հաստատեա՛ յուսով, հիմնեցո՛ սիրով:

- Չայնիւս աղաչեմ, ձեռօքս պաղատիմ, ձիր բարեաց շնորհեա՛: Ղամբարամբ լուսոյ, ղեկավա՛ր ճարտար, ղօղեալս ամբացո՛:
- Չար մշակողին, չար սերմանց նորին չորացո՛ զպտուղն: Պարգեւի՛չ բարեաց, պարգեւեա՛ իմոց պարտեացս թողութիւն:
- Չուր շնորհեա աչացս՝ ջերմ հեղուլ զարտօսք, ջնջել զյանցանս: Ռետի՛նդ քաղցու, ռամ հոգւոյս արբո, ռահ ցոյց ինձ լուսոյ:
- Սէ՛ր անուն Յիսուս, սիրով քով ճմլեա՛ սիրտ իմ քարեղէն: Վասն գթութեան, վասն ողորմութեան վերստին կեցո՛:
- Փրկի՛չ բոլորից, փութա՛ զիս փրկել փորձութեանց մեղաց: Քաւի՛չ յանցանաց, քաւեա՛ զօրհնաբանս՝ քեզ երգել զփառս:
- Սրբուհւոյ Աստուածածնին բարեխօսութեամբ:
- Յիշեա՛, Տէ՛ր, եւ ողորմեա՛:

Քինյ. Զքէն գոհանամք, Տէ՛ր Աստուած մեր, որ շնորհեցեր մեզ հանգիստ քնոյ խաղաղութեամբ եւ զարթուցեալ՝ ժամանեցուցեր զմեզ կանխել յերկրպագութիւն ահաւոր եւ փառաւորեալ անուանդ քում սրբոյ: Տո՛ւր մեզ, Տէ՛ր, աղաչե՛մք զքեզ, զօրս զայս խաղաղութեամբ անցուցանել եւ զամենայն ժամանակս կենաց պանդխտութեան մերոյ երկիւղիւղ քո ամբացո՛ եւ պահեա՛: Որպէս զի, զգուշութեամբ եւ անարատ վարուք կրօնաւորեալք յայսմ աշխարհիս, ժամանեցուք յանքոյթ եւ ի խաղաղ նաւահանգիստ յաւիտենական ի կեանսդ շնորհօք եւ մարդասիրութեամբ Տեառն մերոյ

Եւ փրկչին Յիսուսի Քրիստոսի, ընդ որում քեզ՝ Հօր եւ Հոգւոյդ Սրբոյ վայելի փառք իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն
Աստուծոյ երկիրպագեսցուք

Նայեա՛ց, Տէ՛ր բարերար, ողորմութեամբ քով յերկրպագուս եւ ի փառաբանիչս անուանդ քում սրբոյ: Տէ՛ր զօրութեանց, խաղաղացո՛ր՝ զանձինս մեր յամենայն սատանայական խռովութեանց եւ յաշխարհական զքօսանաց: Զհրեշտակ խաղաղութեան քո առաքեա՛ առ մեզ, որ եկեալ պահեսցէ զմեզ անխռովս ի տուէ եւ ի գիշերի, յարթութեան եւ ի հանգստեան մերում: Որպէս զի բարեպաշտութեամբ եւ արժանաւորապէս քեզ՝ Տեառնդ, ծառայելով ի կեանս յայսոսիկ, ժամանեսցուք յաւիտենական երկնից արքայութեան քոյ, զոր պատրաստեցեր ի սկզբանէ աշխարհի սրբոց քոց, եւ ընդ նոսին գոհանալով՝ փառաւորեսցուք զՀայր եւ զՈրդի եւ զՍուրբ Հոգիդ այժմ եւ միշտ եւ յաւիտեանս յաւիտենից:

Օրհնեալ Տէր մեր Յիսուս Քրիստոս. ամէն:

Ալելուիա, ալելուիա:



Սրկ. Եւ եւս խաղաղութեան զՏէր աղաչեսցուք, ընկալ, կեցո եւ ողորմեա:

Քհնյ. Օրհնութիւն եւ փառք Հօր եւ Որդւոյ եւ Հոգւոյն Սրբոյ, այժմ եւ միշտ եւ յաւիտեանս յաւիտենից, ամէն:

Դպ. Փառք ի բարձունս Աստուծոյ, եւ յերկիր խաղաղութիւն, ի մարդիկ հաճութիւն: Եւ օրհնութիւն քեզ ի բարձունս. օրհնեալ ես, Տէ՛ր Աստուած մեր, օրհնեմք զքեզ եւ զովեմք զքեզ: Խոստովանիմք, Տէ՛ր, զքեզ եւ երկիր պագանեմք քեզ, փառաւորեմք զքեզ, գոհանամք, Տէ՛ր, զքէն վասն մեծի փառաց քոց: Տէր թագաւոր, սուրբդ երկնային, Աստուած եւ Հայր ամենակալ: Տէր եւ Որդի Հօր Միածին՝ Յիսուս Քրիստոս եւ սուրբ Որդի: Տէ՛ր Աստուած, Գա՛ռն Աստուծոյ եւ Որդի՛ Հօր, որ առեր զմերս ի Կուսէն, ողորմեցար, բարձեր զմեզս աշխարհի եւ արդ ընկալ զաղաչանս մեր: Սուրբդ, որ նստիս ընդ աջմէ Հօր, ողորմեա՛ց մեզ: Զի դու միայն սուրբ, դու միայն բարձրեալ ես, դու միայն Տէր մեր Յիսուս Քրիստոս: Տէր եւ Հոգիդ Սուրբ, որ ի փառս Աստուած ընդ Հօր. ամէն:

Եւ յամենայն ժամ օրհնեմք զքեզ, Տէ՛ր, եւ զովեմք զանուն սուրբ քո յաւիտեան եւ յաւիտեանս յաւիտենից: Արժանի՛ արա, Տէ՛ր, զօրս զայս խաղաղութեամբ եւ առանց մեղաց պահեա՛ զմեզ: Օրհնեալ ես, Տէ՛ր Աստուած հարցն մերոց, զովեալ եւ փառաւորեալ է անուն սուրբ քո յաւիտեանս. ամէն: Օրհնեա՛լ Տէր, ուսո՛ ինձ զարդարութիւնս քո (երիցս կրկնեա): Տէ՛ր, ապաւեն եղեր մեր ազգէ յազգ: Ես աղաչեմ, Տէ՛ր, ողորմեա՛ ինձ եւ բժշկեա՛ զանձն իմ. ես մեղայ քեզ: Յո՛յց մեզ, Տէ՛ր, զողորմութիւնս քո եւ զփրկութիւնս քո տո՛ւր մեզ: Տէ՛ր, ողորմութիւն քո յաւիտեան. զգործս ձեռաց քոց մի՛ անտես առնէր: Տէ՛ր իմ, զքեզ ապաւեն ինձ արարի, ուսո՛ ինձ առնել զկամս քո, զի դու ես Աստուած իմ: Ի քէն է, Տէ՛ր, աղբիւր կենդանութեան, եւ լուսով երեսաց քոց տեսանեմք զլոյս: Ծագեա՛ զողորմութիւնս քո, որք ճանաչեն զքեզ, Տէ՛ր:

Քինյ. Փառք, պատիւ եւ երկրպագութիւն ի բարձունս Հօր եւ Որդւոյ եւ Հոգւոյն Սրբոյ այժմ եւ միշտ եւ յաւիտեանս յաւիտենից. ամէն:



Նորաստեղծեալ Բանն յանէից
ի սկզբանէ գերկինս երկնից
եւ գերկնային զօրս անմարմնոց
իմանալեացն զուարթնոց
եւ զգալի տարերց քառից
հակառակաց միաբանից,
որով յաւետ փառաբանի
Երրորդութիւնն անճառելի:

զոր եւ ծագեաց յօրն առաջին
միաշաբաթ կիրակէին,
որով յաւետ փառաբանի
Երրորդութիւնն անճառելի:

Երեքսրբեան մի տէրութիւն,
միով բնութեամբ Աստուածութիւն.
լոյսն, որ անեղ, արարչական,
ասաց լինել լոյս եղական,

Սիոնի՛ որդիք, զարթի՛ք,
հարսին լուսոյ տո՛ւք անետիք,
եթէ փեսայն քո յարուցեալ
յաղթեաց մահու իշխանութեամբ,
գայ պսակէ զքեզ փառօք,
ել ընդ առաջ պճնեալ զարդօք.
երգեա՛ երգ նոր յարուցելոյն՝
ննջեցելոց կենաց պտղոյն:

Սրկ. Խնդրեցուք հաւատով միաբանութեամբ ի Տեառնէ, զի զողորմութեան զշնորհս իւր արասցէ ի վերայ մեր: Տէրն ամենակալ կեցուցէ եւ ողորմեսցի:

Դպ. Կեցո՛, Տէ՛ր: Տէ՛ր, ողորմեա՛, Տէ՛ր, ողորմեա՛, Տէ՛ր, ողորմեա՛:

Քինյ. Քում ամենագօր եւ հրաշալի յարութեանդ, Քրիստո՛ս Աստուած մեր, երկիր պագանեն զօրք հրեշտակաց, զի դու միայն ունիս զանմահութիւն, բնակեալդ ի լոյս անմատոյց: Եւ մեք՝ հողեղէն արարածքս, խոնարհեալք երկիրդիւ երկիր պագանեմք, զսուրբ եւ զհրաշալի եւ զյաղթող զյարութիւնդ քո օրհնեմք եւ փառաւորեմք: Եւ ընդ երկնային զօրսն մատուցանեմք զօրհնութիւն եւ զփառս ընդՀօր եւ ընդ Սրբոյ Հոգւոյդ այժմ եւ միշտ եւ յաւիտեանս յաւիտենից. ամէն:

Քինյ. Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս ես, սուրբ եղիցի անուն քո: Եկեսցէ արքայութիւն քո, եղիցին կամք քո որպէս յերկինս եւ յերկրի: Չհաց մեր հանապազորդ տուր մեզ այսօր, եւ թող մեզ զպարտիս մեր, որպէս եւ մեք թողումք մերոց պարտապանաց: Եւ մի՛ տանիր զմեզ ի փորձութիւն, այլ փրկեա՛ զմեզ ի չարէ: Զի քո է արքայութիւն եւ զօրութիւն եւ փառք յաւիտեանս. ամէն.

-Զսաղմոսերգութիւնս եւ զաղաչանս ընկալցի մարդասէրն Աստուած ի հաճոյս բարերար կամաց իւրոց, մեր մեղացն եւ մեր բազում յանցանացն թողութիւն շնորհեսցէ, ի չարեաց փրկեսցէ, ի մեղաց պահեսցէ. եւ նմա փառք յաւիտեանս. ամէն:

